

ROWLAND, DANIEL (1713-1790), clerigwr Methodistiaidd

Enw: Daniel Rowland
Dyddiad geni: 1713
Dyddiad marw: 1790
Priod: Elinor Rowland (née Davies)
Plentyn: Nathaniel Rowland
Plentyn: John Rowland
Rhiant: Janet Rowland (née Thomas)
Rhiant: Daniel Rowland
Rhyw: Gwryw
Galwedigaeth: clerigwr Methodistiaidd
Maes gweithgaredd: Crefydd
Awdur: Gomer Morgan Roberts

Ganwyd 1713 ym Mhantybeudy, Nantgwnlle, Sir Aberteifi, mab Daniel a Janet Rowland - ei dad yn dal bywoliaeth Nantgwnlle a Llangeitho. Addysgwyd ef, medd traddodiad, yn ysgol ramadeg Henffordd. Cafodd urdd diacon yn 1734, ac urdd offeiriad yn 1735; bu'n gurad i John, ei frawd, yn y plwyfi uchod. Priododd, 1734, Eleanor Davies, Caerllugest. Cafodd brofiad ysbrydol dwys dan weinidogaeth [Griffith Jones](#), c. 1735, a dechreuodd bregethu gyda nerth gan daranu uwchben y bobl. Lliniarodd ei arddull ar gyngor [Philip Pugh](#), gan bregethu gras yn lle'r ddeddf. Dechreuodd deithio dros y wlad; cyfarfu â [Howel Harris](#) yn 1737, a chyn hir ymunodd y ddau ynghyd ag eraill i hyrwyddo'r deffroad mawr Methodistiaidd yng Nghymru. Bu anghydfod rhyngddo â [Harris](#), a chyhoeddodd *Ymddiddan rhwng Methodist Uniawngred ac un Cyfeiliornus* yn ei erbyn yn 1750. Aeth yn rhwyg yn 1752, ac ef bellach oedd arweinydd 'pobl Rowland,' fel y gelwid ei ganlynwyr. Boddodd ei frawd yn Aberystwyth yn 1760, a chafodd mab y diwygiwr fywoliaeth Llangeitho. Bu'n gurad i'w fab am dymor, a chododd gapel at ei wasanaeth ei hun gerllaw eglwys y plwyf. Collodd ei le fel curad c. 1763 am ryw reswm. Apeliodd plwyfolion Nantgwnlle yn ofer am ei gael yn ôl yn 1767. Dewisodd aros hyd y diwedd, gyda'i bobl yn yr 'Eglwys Newydd,' Llangeitho, er cael cynnig bywoliaeth gysurus Trefdraeth, Sir Benfro, yn 1769. Bu farw 16 Hydref 1790, a'i gladdu yn Llangeitho ar 20 Hydref, 'yn 77 oed' meddai rhestr y plwyf.

Pregethwr oedd Daniel Rowland yn anad dim, ac am gyfnod maith gwnaeth Langeitho yn Feca'r Methodistiaid yng Nghymru. Tyrrai'r miloedd yno o bob parth ar Sul y Cymun, a dylanwadodd yn drwm ar ysbryd ei oes. Cyhoeddwyd ei bregethau yn llyfrynnu bychain yn 1739, 1762, 1772 (dwy gyfrol), a 1775. Troswyd rhai ohonynt i'r Saesneg, a'u cyhoeddi yn 1774, 1775, a 1788. Canodd nifer o emynau hefyd ar gyfer y casgliadau cynnar megis *Llwybur Hyffordd i'r Cymru*, 1740, a *Sail, Dibenion, etc.*, 1742. Ceir chwech emyn o'r eiddo yn niwedd *Marw i'r Ddeddf, etc.*, 1743, 19 yn *Hymnau Duwiol, etc.*, 1744, a chyhoeddodd gasgliad bychan o *Hymnau Duwiol* yn 1745. Ei gasgliad olaf oedd *Pum Pregeth ac Amryw o Hymnau*,

1772. Yr oedd yn un o arloeswyr yr emyn Cymraeg cyn dechrau o [William Williams](#) ganu. Trosodd rai pethau o'r Saesneg i'r Gymraeg, megis *Y Rhyfel Ysbrydol* (Bunyan), 1744; [Aceldama](#), 1759; [Pymtheng Araith](#) (Wetherall), 1762; a *Camni yn y Coelbren* (Boston), 1769.

Ei fab hynaf oedd

JOHN ROWLAND (1735 - 1815)

Ganwyd 14 Hydref 1735, urddwyd yn ddiakon 1757, ac offeiriad 1758. Ef a gafodd fywoliaeth Llangeitho yn 1760. Aeth i Goleg Iesu, Rhydychen, yn 1757; ni ddywed Foster iddo raddio (ac y mae'n galw ei dad yn 'John,' ac yn dyddio ei ymaelodi yn 1767); eto priodolir M.A. iddo. Yr oedd yn gurad Eglwys Fair, Amwythig, yn 1761, a churad Clive yn 1783-1810. Gwasnaethodd fel athro yn ysgol Amwythig, 1771-98. Bu farw 28 Tachwedd 1815. Ei wraig oedd Mary, merch y Parch. William Gorsuch, Amwythig. Daeth dau o'u plant yn enwog, sef

WILLIAM GORSUCH ROWLAND (1770 - 1851)

ficer Eglwys Fair, Amwythig, a phrebendari Lichfield.

DANIEL ROWLAND (1778 - 1839)

hynafiaethydd, noddyydd y celfau cain, a dyngarwr.

Mab arall iddo oedd [Nathaniel Rowland](#).

Awdur

Y Parchedig Gomer Morgan Roberts, (1904 - 1993)

Ffynonellau

J. Owen, *Hanes bywyd a gweinidogaeth y Parchedig Daniel Rowlands, (gynt o Langeitho), ynghyd a chofiant byr am yr enwogion canlynol, sef William Salesbury, William Morgan, Richard Davies, Richard Parry, Dr. Davies, o Fallwyd, Archddiacon Prys, Rowland Heylin, Syr Thomas Myddleton*, 1839 (arg. Saesneg 1848)

M. Davies, *Cofiant y Parch. Daniel Rowland* (1871)

D. Worthington, [Cofiant y Parch. Daniel Rowland, Llangeitho \(Llanbed 1905\)](#)

J. Morgan Jones a W. Morgan, [Y Tadau Methodistaidd \(1895-1897\)](#), i, 41-70

D. J. Odwyn Jones, *Daniel Rowland, Llangeitho* (Llandysul 1938)

Cylchgrawn Cymdeithas Hanes y Methodistiaid Calfinaidd, vii, 34; xii, 41-72, 111; xiv, 90; xix, 125; xx, 155; xxvi, 36; xxviii, 165; xxix, 33; xxx, 80

Heddiw, iii, 378

Y Cymmrodor, xxii, 62

Archaeologia Cambrensis, xcix, 151

Horsfall-Turner, *Walks and Wanderings in County Cardigan* (1902), 254-7

Oxford Dictionary of National Biography

Cylchgrawn Llyfrgell Genedlaethol Cymru, i, 167

Episcopal register and *Cofysgrifau'r Eglwys yng Nghymru yn Llyfrgell Genedlaethol Cymru*

Foster, *Alumni Oxonienses* - noder y pwyntiau y sylwyd arnynt yn yr ysgrif, ond y mae oedran yr ymaelodi, a'r cyswllt ag ysgol Amwythig ac â W. G. Rowland, yn bwrw mai dyma'r dyn sydd ganddo; odid nad gwall argraff yw '1767'

Darllen Pellach

Erthygl Wicipedia: [Daniel Rowland](#)

Gweithiau

Daniel Rowlands, [Ychydig o hymnau yn ychwaneg \(Caerfyrddin 1773\)](#)

Daniel Rowlands, Peter Williams, [Pumtheng araith ar amryw destynau \(Caerfyrddin 1762\)](#)

Daniel Rowlands, Morris Davies (gol.), [Deuddeg pregeth ar bynciau ymarferol... hefyd cofiant yr awdwr, ynghydag attodiad, yn cynnwys gweddillion amrywiol o'i waith, a marwnadau coffadwriaethol iddo \(Dolgellau 1876\)](#)

Sain a Ffilm

Eryn Mant White: [Cofio Daniel Rowland Llangeitho](#)

Dolenni Ychwanegol

VIAF: [168822997](#)

Wikidata: [Q3400440](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

